

DIARIO

UN BANDERA... UN ESCUDO... UN HIMNO... UN DIARIO

☎ 582-6747

📍 Engelandstraat 29

@ noticia@diario.aw

🌐 www.diario.aw

1.75 FLORIN

BIDA

**Bestaans
minimum a
cay un tiki
pa luna di
Januari**

Dr. Joyce Pereira:

**"Idioma materno ta e aspecto
di mas importante cu ta
determina nos como hende"**



ORANJESTAD (AAN): Den cuadro di Dia Internacional di Idioma Materno, Fundacion Lanta Papiamento conhuntamente cu Fundacion Rancho a organisa un lectura riba Papiamento.

Dr. Joyce Pereira tabata un di e oradonan invita y el a elabora riba dicon Papiamento mester ta e idioma di mas importante den enseñansa multilingual na Aruba y e ta conecta esaki cu e lema di UNESCO e aña aki: Enseñansa Multilingual necesario pa transformacion den enseñansa. Idioma materno ta e aspecto di mas importante cu ta determina nos como hende. E ser humano so tin un medio, un herment asina sofisticada cu e ta uza pa pensa, pa comunica, pa argumenta, pa conceptualisa, inventa, siña, expresa, a bisa.

Pereira a agrega cu tur idioma na mundo tin e funcionnan aki. Tur idioma tin un gramatica (reglanan), un vocabulario, y un manera pa pronuncia y tur esey ta haci cada idioma unico. "Niun idioma no ta mihor of mas bunita of mas importante cu otro.

Pa cada pueblo su idioma ta un tesoro bibo masha grandi mes. Ta via su idioma, un pueblo ta pasa conocimiento, historia, cultura di un generacion pa otro. Te hasta asina cu ora un idioma muri, pa henter un cultura, historia, herencia a bay perdi", asina Dr. Joyce Pereira a señala.

Neglisha of hasta bringa idioma materno pa un mucha of un pueblo no ta nada otro cu un crimen cometi contra derecho di mucha, contra derecho humano. Hopi documento di UNESCO y di científiconan nacional y internacional ta enfatisa esaki, el a splica.

Den un otro secuencia di articulonan DIARIO lo trece mas informacion valioso dilanti tocante e importancia di idioma materno.

**Por fin a yega na un
permiso temporal pa tur
centro di cuido di mucha**

Pagina 3

Teenager a ricibi puñal grave y bay pidi auxilio na Coba Lodo

☑️ **Polis den accion relampago a detene agresor**



- Agresor tambe ta un teenager y awor pasa pa Polis di JZP
- Teenager awor cu acusacion serio colga riba dje

Biblioteca a haya varios ehemplar di e buki 'Mihó lat ku nunca'

ORANJESTAD (AAN): Directora di biblioteca, sra. Astrid Britten, a ricibi 10 ehemplar di e buki pa mucha titula 'Mihó lat ku nunca' di e escritora di Curaçao sra. Jenilva (Jenny) Coffi-Alberto. Esakinan a bin como 'special delivery' cu Tito Lacle.

Caracter principal den e buki pa mucha, ta un djaca y e ta biba den camber patras di un cashi paña. E storia ta tocante lesamento y cu nunca no ta lat pa siña lesa y bira un gran lesador. Pronto muchanan por lesa of fia e buki aki na biblioteca na Playa of na San Nicolas. Sra. Britten a keda hopi contento cu Tito a trece e buki pa biblioteca hubenil na Aruba.

Jenny Coffi-Alberto ta viuda y mama di 2 yiu y el a cuminsa skirbi na 2000. E ta gusta experimenta y ta skirbi cuenta pa mucha pero tambe Haiku. Den siman di 'Ban lesa' na Curaçao, sra. Jenny ta bishita diferente scol na Curaçao pa conta storia y introduci su buki. Otro buki di sra. Jenny ta 'Het geluk van Kianu'.



Jenilva (Jenny) Coffi-Alberto